

Pesaka belum putus asa

20 JAN 1991

B. Minggu (M)

PERSEKUTUAN Silat Kebangsaan Malaysia (Pesaka) akan berusaha memujuk Jawatankuasa Penganjur Sukan SEA XVI di Filipina agar menyenaraikan silat sebagai salah satu acara pada temasya sukan itu, November depan.

Menteri Besar Selangor, Tan Sri Haji Muhammad Haji Muhd Taib, berkata beliau dan Presiden Persekutuan Silat Antarabangsa (Persilat), Eddy M Nalapraya, akan menemui penganjur Sukan SEA di Manila, Februari ini bagi membincangkan perkara itu.

Jika sukan itu disenaraikan, Pesaka dan Pesilat bersetuju mengelolakan acara itu bagi pihak tuan rumah sewaktu pertandingan nanti, katanya yang juga Presiden Pesaka, kepada pemberita selepas mempengerusikan mesyuarat Pesaka, di Pulau Pinang semalam.

Beliau berkata, Pesaka dan Pesilat juga akan membantu Filipina menubuhkan sebuah persekutuan silat yang merupakan syarat diperlukan sebelum sesebuah negara menganjurkan acara silat.

Filipina sebagai tuan rumah enggan menyenaraikan silat pada Sukan SEA selepas bermesyuarat di Beijing sempena Sukan Asia, Oktober tahun lalu.

Sebelum itu, Filipina bersetuju menerima silat, tetapi menukarnya di Beijing dengan menyenaraikan taekwondo dan Wushu yang sebelumnya digugurkan.

Pesaka dalam mesyuaratnya, semalam turut memutuskan bahawa Kedah akan menjadi tuan rumah Kejuaraan Silat Kebangsaan tahun ini, manakala Melaka pada tahun depan dan Perak tahun 1993.— Bernama

Senaraikan silat olahraga

22 JAN 1991

Annuar sedia bantu Pesaka

B. Harian (M)

Oleh RAHIME YUSOF

MENTERI Belia dan Sukan, Senator Haji Annuar Musa, sedia campur tangan bagi menyakinkan Majlis Olimpik Filipina (FOC) agar dapat menyenaraikan semula acara silat olahraga pada Sukan SEA di Manila, November depan.

Presiden Persekutuan Silat Kebangsaan Malaysia (Pesaka), Tan Sri Haji Muhammad Muhd Taib, berkata keputusan Haji Annuar untuk turut membabitkan diri menyakinkan Pesaka bahawa kemungkinan silat disenaraikan semula agak cerah.

Semalam, ahli majlis Pesaka mengadakan perjumpaan khas dengan Haji Annuar selama kira-kira satu jam di pejabatnya bagi membincangkan masalah berkenaan.

"Saya amat sukacita apabila Haji Annuar berhasrat untuk campur tangan dan bersedia mengikuti rombongan Pesaka ke Manila bagi berbincang dengan FOC bulan depan jika tidak mem-



punyai urusan rasmi kerajaan yang penting," katanya.

Rombongan itu akan diketuai sendiri oleh Tan Sri Haji Muhammad serta Presiden Majlis Olimpik Malaysia (MOM), Tan Sri Hamzah Abu Samah dan Presiden Persekutuan Silat Antarabangsa (Persilat), Eddy M Nalapraya.

Mereka akan berada selama tiga hari di Manila mulai 15 Februari depan.

Menurutnya, Pesaka akan mengemukakan usul bahawa tiga syarat yang ditetapkan dalam Perlembagaan Su-

kan SEA lebih daripada mencukupi.

Antaranya ialah setiap acara perlu disertai oleh lebih empat negara, kemudahan kelengkapan pertandingan sedia dipenuhi oleh Pesaka dan Persilat, manakala pertumbuhan silat Filipina sudah diwujudkan, cuma tidak diiktiraf oleh FOC.

"Saya percaya perbincangan di Manila itu nanti akan memberi jawapan positif kerana acara silat memenuhi tiga syarat utama untuk disenaraikan pada Sukan SEA," katanya.

Tan Sri Haji Muhammad berkata, selain perbincangan itu, Haji Annuar juga bersetuju memberi kerjasama dengan Pesaka bagi mengembang silat, termasuk silat olahraga, secara lebih berkesan-sungguh-mulai tahun ini.

Katanya, menteri itu bersedia menjadikan silat sebagai cabang ke arah membentuk disiplin dan mempertahankan budaya bangsa di kalangan belia negara ini.